

Segun Nilo Swaen di MEP:

Nombramento di Presidente di Raad van Advies ta otro prueba di mal Gobernacion

ORANJESTAD (AAN): Segun Nilo Swaen di MEP, cu sorpresa nan a tuma nota di e nombramento di sr. Armand Engelbrecht como presidente di Raad van Advies. Nos sorpresa a bira mas grandi na momento cu nos a tuma nota di e defensa di gobierno pa dicho nombramento.

Raad van Advies mescos cu Parlamento y Contraloria General ta ser menciona especificamente den nos constitucion pa e hecho di e caracter special cu nan tin. E trabonan cu tur e tres organonan aki mester eherce mester resalta nan mes den e forma autonomo y di un caracter incompatibel cu cual nan mester funciona. Parlamento di Aruba apesar cu no ta funciona di un manera in-

dependiente manera tur hende ta desea, escogencia di su representacion ta den man di e pueblo di Aruba cu mester huzga kendenan lo tin e mentalidad pa forma parti di dicho Parlamento pa medio di eleccionnan popular.

Den e caso di tanto Contraloria General y Raad van Advies esaki ta otro. E miembronan di e dosnan aki ta ser nombra dor di Parlamento y Gobierno respectivamente. E argumento presenta pa gobierno cu ta tur persona na Aruba ta liga politicamente y cu a encamina e procedimiento corecto no ta kita e incompatibilidad cu e nombramento aki ta trece cune.

Segun Swaen, Engelbrecht

a forma parti di lista di partido AVP durante e ultimo eleccion y como tal ta forma parti activo di partido durante e temporada di 4 aña o te na un proximo eleccion. Su persona oficialmente ta forma parti di consoho di partido AVP, es decir cu e ta forma parti activamente di e proceso di formulacion di idea, determinacion di strategia y vision y toma di decision di partido.

Nos constitucion ta papia bon cla di puestonan cu no ta compatibel cu esun di presidente y miembronan di Raad van Advies. Hecho ta cu berdaderamente a pasa e procedura stipula pa ley pero e ta linea recta contra e spirito di nos constitucion. Importante den practica di e diferente funcionan ta e hecho di incompatibilidad. Nos constitucion ta papia palabra cla den aplicacion di e articulon, esta cu e incompatibilidadnan menciona den nos constitucion tin como objetivo pa promove cu e miembronan nombra lo eherce nan funcion

independiente den formulacion di nan opinion.

Mas leu nos constitucion ta duna e oportunidad pa amplia e funcionan cu ta ser mira como incompatibel. Con por ta posibel cu e mesun persona cu ta activo den formacion di idea y toma di decision den un partido politico ta ser nombra presidente di un organo cu mester conseha gobierno ariba tur proyectonan di ley, landsbesluitnan, verdragen etc. Den pasado hopi tabata e instancianan tercio cu a critica e hecho cu Parlamento no tabata sigui consohonan di Raad van Advies, considerando cu dicho organo ta haci un trabao leu di politica y ta mantene su mes den un forma objetivo y trece asina e balance exige den toma di decision den un pais. Esaki sigur lo no ta un ehempel pa ningun gobierno sigui. Na momento cu decisionan asina ser tuma bo no ta hustificando e proceduranan oficial, pero bo ta treciendo na duda e confianza y objetividad di organonan autonomo den nos pais. Locual ta imperativo pa

e confianza cu un pueblo mester tin den e forma democratico di funciona den un pais.

Na februari-maart proximo presidente di Banco Central tambe su periodo lo pasa y mester nombra un presidente nobo. Desde awor caba nos kier pa gobierno, den cuadro di un maneho transparente, menciona cua ta e candidato cu tin na bista pa eherce e funcion aki. Nos ta spera cu nos no bin para atrobe dilanti un sorpresa cu un persona liga na partidonan den gobierno lo ser nombra. Tin decisionan cu na momento cu tuma nan, importancia mester ser poni na salvaguardia confianza den funcionamiento autonomo di dicho institucion o organo. Y no mester duna ni e minimo di posibilidad pa pueblo por duda den decisionan o consohonan otorga pa organonan o institucionnan autonomo.

Esaki ta otro prueba cu raport Calidad ta scirbi pa consumo politico pero no ta cumpli cu reglanan basico di bon gobernacion.

Mientras cu tin paro di personal:

Ministro Mary ta pone 4 empleado nobo den Departamento di labor

ORANJESTAD (AAN) Na Departamento di Labor e empleadonan mes no sa mas ki rumbo e barco yama "HMS Queen Mary" ta tumando despues cu esaki a pega riba casi tur rif laboral, gubernamental, hudicial y te hasta riba un parkinglot caminda cu tas y hilchi di sapato a bay laira den un bululu anti social hamas bisto na Aruba.

E barco di Mary a perde rumbo por completo, pasobra entrante prome di januari e aña aki 4 empleado nobo a haci nan entrada na Departamento di Labor mientras cu tin un paro di personal na gobierno.

Gobierno a aplica un parc di personal pa tur departamento, pa trata di baha gastonan y ta pesey tambe den diferente departamento tin re organizacionnan andando pa elimina gastonan innecesario.

Den Departamento di Labor tin un re organizacion andando y ainda no ta conoci cuanto hende lo mester hala di nan puesto despues di e re organizacion y ata shon Mary ta dicidi di tuma 4 empleado nobo den servicio.

Por bien ta cu pa personal cu tin nivel di HBO no mester aprobacion di gobierno pa cu e maneho di paro di personal, pero ta con Mary kier pone 4 empleado nobo sin experiencia riba tereno laboral den un departamento caminda no ta conoci ainda ken ta bay keda riba cua puesto despues di reorganizacion?, segun empleadonan di dicho departamento.

Segun reglanan nobo cu tin, cada ministro y hefe di departamento ta para personalmente responsabel pa actonan contra maneho y contra ley y ta pesey empleadonan di Departamento di

Labor ta puntra nan mes ta di unda Mary Wever ta bay saca placa di presupuesto pa paga e 4 trahadoran?

CARNAVAL TA SIGUI!!

